



Alþingi - Allsherjarnefnd
Nefndasvið Alþingis
Austurstræti 8-10
150 REYKJAVÍK

Reykjavík, 15. mars 2010
Tilvísun: 2010030003
Bréfalykill: 50.11
Verknúmer: 1227000

Efni: Umsögn Orkustofnunar um tillögu til þingsályktunar um sóknaráætlun til eflingar atvinnulífi og samfélagi um land allt, 332. mál.

Orkustofnun hefur borist erindi allsherjarnefndar Alþingis, dags. 1. mars 2010, þar sem óskað er umsagnar stofnunarinnar um tillögu til þingsályktunar um sóknaráætlun til eflingar atvinnulífi og samfélagi um land allt, 332. mál.

Orkustofnun hefur kynnt sér framangreinda tillögu til þingsályktunar og fagnar stofnunin því frumkvæði ríkisstjórnarinnar að undirbúa heildarstefnu til að efla atvinnulíf og samfélag um land allt. Orkustofnun vill í kjölfarið koma á framfæri eftirfarandi athugasemdum.

Í tillögunni segir m.a. að heildstæð sýn og sameiginleg markmið tryggi markvissari og öflugri áætlanagerð og með sóknaráætlun mun ríkisstjórnin samþætta opinberar áætlanir sem miða að því að efla atvinnu, menntun og endurskipulagningu opinberra þjónustu. Þá segir að meðal þeirra áætlana sem skal samþætta er áætlun um orkubúskap þjóðarinnar, hagnýtingu orkulinda og annarra jarðrænna auðlinda landsins, sbr. 4. tölul. 1. mgr. 2. gr. laga um Orkustofnun, nr. 87/2003. Orkustofnun tekur undir mikilvægi þess að samþykkt sé almennt heilstæð orkustefna. Orkustofnun bendir einnig á að í samstarfsyfirlýsingu ríkisstjórnarinnar segir að mótuð skuli heildstæð orkustefna sem skuli miða að því að endurnýjanlegir orkugjafar leysi innflutta orku af hólmi og að við orkuframleiðslu með vatnsafla og jarðvarma verði gætt varúðar- og verndarsjónarmiða. Þá er einnig kveðið á um að orkustefnan skuli styðja við fjölbreytt atvinnulíf, með áherslu á uppbyggingu vistvæns hátækniíðnaðar og að sjálfbær nýting verði höfð að leiðarljósi. Ennfremur segir í samstarfsyfirlýsingunni að ríkisstjórnin vilji efla græna atvinnustarfsemi, þar með talin verkefni þar sem hrein og endurnýjanleg orka er nýtt á sjálfbæran hátt til verðmæta- og atvinnusköpunar. Lögð verði áhersla á að kortleggja sóknarfæri Íslands í umhverfisvænum iðnaði og ýta undir fjárfestingar með tímabundnum ívilnunum og hagstæðu orkuverði.

Með vísan til framanritaðs vekur Orkustofnun athygli á að iðnaðarráðherra hefur skipað sjö manna stýrihóp sem hefur það hlutverk að undirbúa og fjalla um efnistöð og framsetningu stefnumótunar á sviði orkumála.

Þá bendir Orkustofnun einnig á að vinna við II. áfanga rammaáætlunar um nýtingu vatnsafls og jarðvarma stendur enn yfir og er þeirri vinnu ætlað að ljúka á þessu ári. Er þeirri vinnu m.a. ætlað

vinna að því að skapa sátt um vernd og nýtingu náttúrusvæða. Sérstök áhersla er lögð á að meta verndargildi háhitasvæða landsins og flokka þau með tilliti til verndar og orkunýtingar. Stefnt verður að því að leggja niðurstöðu rammaáætlunar fyrir Alþingi til formlegrar afgreiðslu.

Með vísan til framanritaðs vill Orkustofnun vekja athygli á að stjórnvöld eru nú þegar að vinna að einstökum þáttum sem m.a. vísað er til í tillögunni. Á grundvelli þeirrar vinnu, þ.e. niðurstöðu rammaáætlunar og mótun orkustefnu, er unnt að vinna með upplýstum hætti að umræddri tillögu hvað varðar þessa þætti.

Í greinargerð með umræddri tillögu til þingsályktunar segir, á bls. 8, að gert sé ráð fyrir að Bygðastofnun, starfsstöðvar Nýsköpunarmiðstöðvar Íslands, atvinnuþróunarfélög, menntastofnanir og setur og velferðarstofnanir í viðkomandi landshlutum hafi samvinnu um að veita landshlutasamtökum þeim sem lagt er til að komið verði á fót samkvæmt tillögunni, ráðgjöf við gerð sóknaráætlunarinnar. Í ljósi þessa, og að í tillögunni er gert ráð fyrir fyrrgreindri áætlun um orkubúskap þjóðarinnar, hagnýtingu orkulinda og annarra jarðrænna auðlinda landsins, vekur Orkustofnun athygli á að samkvæmt 1. tölul. 1. gr. laga um Orkustofnun ber stofnunin lagalega skyldu til þess að vera ríkisstjórninni til ráðuneytis um orkumál og önnur auðlindamál sem stofnuninni eru falin með lögum og veita stjórnvöldum ráðgjöf og umsagnir um þau mál. Að auki ber Orkustofnun samkvæmt 3. tölul. sama ákvæðis að safna gögnum um orkulindir og aðrar jarðrænar auðlindir, nýtingu þeirra og orkubúskap landsmanna, varðveita þau og miðla upplýsingum til stjórnvalda og almennings. Í ljósi þessa bendir Orkustofnun á að stofnunin ber lagalega skyldu til að veita ráðgjöf hvað varðar lögbundið verkvið stofnunarinnar. Í ljósi þessa telur Orkustofnun æskilegt að leitað sé ráðgjafar stofnunarinnar varðandi þau málefni sem henni eru falin lögum samkvæmt.

Þá er í 4. tölul á bls. 8 vísað til þess að við stefnumörkun verði m.a. lögð áhersla innviði samfélagsins, þ.m.t. orku- og veitukerfi. Vekur Orkustofnun athygli allsherjarnefndar á að iðnaðarráðherra hefur skipað ráðgjafahóp til að fara yfir fyrirliggjandi tillögur Landsnets um leiðir til að bæta raforkuöryggi á Vestfjörðum og leggja mat á það til hvaða aðgerða þurfi að grípa til að bæta samkeppnisstöðu Vestfjarða til atvinnuuppbyggingar í orkufrekum iðnaði. Umsjón með störfum hópsins er í höndum Orkustofnunar. Að mati Orkustofnunar kunna niðurstöður umrædds ráðgjafahóps að nýtast við þá vinnu sem lögð er til í framangreindum tölulíð, þ.e. varðandi orku- og veitukerfi.

Orkustofnun gerir að öðru leyti ekki athugasemdir við efni tillögunnar.

Virðingarfyllt

Lárus Ólafsson

